



L'edifici da la Cassa da pensiun dal Grischun sa chatta a la Via Alexander en la vischinanza da la staziun. MAD

Cassa da pensiun cun rendita totala da set pertschient

L'onn da gestiun 2017 da la Cassa da pensiun dal Grischun (CPGR)

■ (cp) La Cassa da pensiun dal Grischun (CPGR) ha cuntanschì l'onn 2017 ina rendita totala fitg buna da 7%. Il grad da garanzia da la CPGR è s'augmentà uschia sin 105,1%. Quai correspunda ad ina reserva da fluctuaziun da 136 milliuns francs. Quella fiss pli auta sche la cumissiun administrativa n'avev betg concludì per ils 31-12-2017 da far in'ulteriura retenziun da 50 milliuns francs per finanzia in reduziun futura dal tschains tecnic e da las tariffas da conversiun. Questa retenziun ha ina influenza directa sin il grad da garanzia. La buna rendita totala ha incità la cumissiun administrativa da tschainsir il chapital da spargn da las activas 2018 cun 1,5%. Questa valor è 0,5% pli auta ch' il tschains tenor LPP.

La CPGR è la cassa da pensiun da blers patruns da dretg public, respectivamain da lur lavurantas e lavurants. Dals patruns affiliads a la CPGR fan part ils instituts dal chantun, il chantun sez cun ses posts da servetsch e bleras vischnancas, blers consorzis da scola e blers auters patruns ch'adempleschan incumbensas publicas. Cun la summa da bilantscha da circa 2800 milliuns francs è ella la cassa da pensiun la pli gronda dal Grischun. En tut la Svizra na fa ella però betg part da las cassas da pensiun las pli grondas, mabain tutga dentant tar ils emprims 10% da tut las cassas. La grondezza dat stabilitad a la cassa. Quai pussibilitescha ad ella da contractar bunas cundiziuns sin il martgà.

Rendita e grad da garanzia

La buna rendita sin la facultad d'investiziun da 7% è resultada cunzunt pervia da

renditas d'aczijs extraordinariamain autas. Er las immobiglias èn sa svilupadas positivamain. Il sector da las obligaziuns e la liquiditad – ensemen tuttina 1/3 da tut las investiziuns da la facultad – n'han dentant strusch gidà a cuntanscher la rendita. En ils conturns actuals cun tschains bass sco anc mai dependan las cassas da pensiun fermamain da la rendita sin ils martgads d'aczijs. Sche quellas vegnan ad avair resultats pli bass en l'avegnir vegnan autras categorias da bains d'investiziun a pudair cumpensar quai mo per part.

Per ils 31-12-2017 è il grad da garanzia 105,1%. El fiss considerablamain pli aut sche la cumissiun administrativa n'avev betg concludì da far in'ulteriura retenziun da 50 milliuns francs per finanzia in reduziun futura dal tschains tecnic e da las tariffas da conversiun.

Custs d'administraziun bass

Grazia ad in'organizaziun concisa e grazia ad in'administraziun effizienta ha la CPGR custs d'administraziun bass. Uschia resta dapli chapital per la prevenziun sco tala. Ils custs per l'administraziun da la facultad han importà l'onn 2017 mo 0,22% (envers 0,48% sco media da las cassas da pensiun svizas, studi CP Swisscanto 2017). Per in chapital da 100 francs impunda pia la CPGR mo 22 raps per l'administraziun da la facultad. Er ils custs en connex cun l'administraziun da l'assicuranza èn bass sco anc mai. L'onn da gestiun han els importà 124 francs per persuna assicurada (tenor il studi da Swisscanto 2017 èn quests custs en la media svizra 337 francs).

Augment da las prestaziuns en il sector da ristga

Grazia ad in bun andament da las ristgas pon ins meglierar las prestaziuns en il sector da ristga senza stuair adattar la premia da ristga. Dapi il 1-1-2018 survegnan – a la mort d'ina persuna assicurada activa – ils agens uffants, sche tals mancan, ils geniturs, sche tals mancan ils fragliuns l'entir dabun da spargn, pia 100% (fin ussa 50%), sche las prestaziuns na ston betg vegnir pajadas al consort u al partenari da vita. Uschia vala dapi il cumenzament da l'onn la cumplaina restituziun da las premias.

Finamiras a media vista

Cur che la prevenziun professionala è vegnida introducida n'eri betg previs che las persunas assicuradas activas finanzieschian las prestaziuns a las persunas che retiran rentas. Tar la CPGR èsi il mument uschia che las prestaziuns a las persunas che retiran rentas vegnan finanzadas per part en il sistem da repartiziun e pia cun agid da las persunas assicuradas activas. Uschè ditg ch' il tschains tecnic (actualmain 2,5%) che vegn duvrà per calcular las tariffas da conversiun e pia las prestaziuns a las persunas che retiran rentas sa chatta sur il tschains dals dabuns da spargn da las persunas assicuradas activas resulta in tractament inequal.

A media vista stoi esser la finamira da la CPGR da tractar da medema maniera las persunas assicuradas activas e las persunas che retiran rentas. Quai vegn cuntanschì sch' il tschains dals dabuns da spargn da las persunas assicuradas correspunda al tschains tecnic per calcular las rentas. Quai n'è (anc) betg cuntanschì. Ma i vegn lavurà vinavant vidlonder.